

MAESTRONAN DI IPA KIER UN CLARIDAD DI MINISTRO

Pa loke ta trata e proyecto

ORANJESTAD (AAN): Awemainta ta un dia dificil pa e maestronan y alumnonan di IPA. Ta apenas algun dia pasa nan a haya tende cu lesnan lo ser duna pa e aña escolar nobo na St. Theresia School na San Nicolas.

E alumnonan como tambe e maestronan ta haya tur esaki algo lamentable, como cu un biaha mas nan a bira "de dupe" den henter e caso aki.

Den fin di siman e maestronan di IPA a tene un conferencia di prensa pa elabora riba e ultimo acontecimentonan y tambe pa trece den publicidad algo di e "lucha" cu esnan responsable pa e proyecto di IPA ta hibando pa hopi tempo caba cu Gobierno.

Loke nan ta ripara cu nan ta haya indicacion cu ta mustra den direccion cu tin e intento di reduci IPA na solamente un tarea.

Manera ta conoci, e proyect-dossier di IPA ta indica cu e lo tin tres fase, y nan ta como lo siguiente:

- (1) Formacion Inicial.
- (2) Recapitacion.
- (3) Investigacion y Desaroyo.

Ta parece cu Gobierno kier pa IPA traha solamente a base di e prome tarea, esta esun di Formacion Inicial.

E maestronan ta ripara cu ora ta sali un aviso den corant pa busca un hende pa vacatura di director, no ta pone den e aviso cu ta pidi pa un director di un instituto cu tin como tarea: formacion inicial, recapitacion, y investigacion y desaroyo.

Loke nan ta pone den e aviso ta: Ta busca un director pa un instituto cu mester duna formacion inicial y eventualmente recapitacion. No ta

mentona mes e tarea di Investigacion y Desaroyo.

Esaki ta algo cu e maestronan ta considera hopi serio, pasobra na cierto momento nan como docente ta traha na e instituto aki y nan ta worde tuma na trabao cu e perspectiva cu mañan nan ta duna les pero tambe ta yuda na recapitacion y tambe na e investigacion y desaroyo.

Algun siman pasa a sali un aviso den corantnan na Hulanda pa atrae docentenan bin traha na Aruba pa e instituto nobo. Un di e puntonan cu tin den e aviso (cu a ser traha en cooperacion di Departamento di Enseñanza) ta worde bisa bon cla cu un di e tareanan lo ta e.o. yuda na recapitacion. Nan a bin traha pues cu e perspectiva cu nan trabao lo ta tambe pa haci recapitacion.

Loke nan ta ripara awe ta cu Departamento di Enseñanza ta ocupa cu plannan pa nan mes haci cierto proyectonan di recapitacion, y lo mas straño ta cu ta haciendo esaki riba net e dos terenonan pa cual a atrae e docentenan Hulandes pa traha na IPA, esta riba tereno di Natuurkunde y Wiskunde.

Tur esaki sin cu e personanan aki ta worde envolvi den e proyectonan aki mientras cu originalmente pesey nan a ser treci na Aruba, y sin cu e instituto mes cu mester bira esun di

recapitacion ta worde envolvi den henter e proceso aki.

Esaki ta laga e maestronan di IPA haci e pregunta: "Kico ta pasando?" Tin un intento aki pa kita e tarea di recapitacion for di e instituto aki y lage na Departamento di Enseñanza.

Diabierna den un reunion cu e Maestronan a tene cu Departamento aki, nan a ricibi e mensahe cu e Departamento a haya Diahuebs e respondi di Ministro cu e titular ta laga na Departamento di Enseñanza duna conseho na su Ministerio ta cual parti di e proyect-dossier di IPA por worde checuta y cual parti no.

Esaki ta algo cu a laga e maestronan di IPA tur confuso. Nan a pidi Departamento di Enseñanza y tambe lo pidi na e Ministro concerni pa duna nan un claridad con nan mester mira e decision aki.

Ta inaceptable pa e di e proyecto di IPA ta worde Maestronan cu henter e base kibra.

**Telefon di
DIARIO**

**22207 - 26747
32352 - 35023
35026**